



Total number of document(s): 1

名采論壇  
E04

Apple Daily

左丁山  
2017-07-30

GG細語

## 會計師好搵

保險界前輩P請左丁山到福臨門食飯，嘆息好多人進入保險行業，個個爭住做前線經紀代理，唔願做後勤工作，實則上並非好多人適合做前線嘅，把口唔得，面皮唔夠厚，性格害羞之人，一定做唔成，反而後勤專業工作有好多職位冇人吼，正是有工冇人做。

因是之故，前輩P幾經努力，聯同保險業人士幫忙，說服咗 **恒生管理學院**（或者係一拍即合，因 **恒管** 係一間講求實在實用學位課程嘅學院），今年九月開辦保險學學位課程，前輩P亦會親自出馬，抽空教埋一份，以盡提攜後輩之責。佢話保險業係佢衣食父母，要常懷感恩之情，事實上香港好有條件成為亞洲保險業中心，只要人才足夠就得嘞，未來一帶一路真係發展起來的話，各種非人壽保險生意會大到不得了，香港不能錯失機會，拱手讓給新加坡。

中大港大都有精算課程，培養精算師，但保險學就似係 **恒生管理學院** 首創，今年DSE學生不妨考慮。

會計師T又同左丁山講，叫學生選讀會計啦，呢行需要接班人㗎，左丁山話：「會計學唔駛宣傳喇嘍！雖非狀元學科，已係尖子天堂咯啲。」會計T話：「最近不少人講呢行工作時間長，好似係非人生活，嚇怕人，我驚有啲中學生唔敢報讀會計系嘅。」報紙係咁講嘅，實際上會計系學生最易搵工，會計師公會做咗一個調查（2016年12月），香港會計師有60%年齡在45歲以下，幾年輕，有65%在企業工作，25%在會計師樓，其他在政府、NGO等等。講到薪酬，有49%會計師賺年薪超過60萬港元，當然係中產啦，另外41%年薪介乎30萬至40萬之間，新入行嘅（10%）亦有年薪30萬元以下，以香港薪酬水平而論，係屬於高薪一族，以左丁山所見所認識嘅，不少會計師泊在馬會停車場嘅車，係法拉利保時捷大Benz㗎！薪水不錯嘞，工作時間又如何？會計師公會調查發現，53%每周工作50小時或以上，41%工作40-49小時以下，其中工時較長嘅，2%工作90小時或以上，最辛苦嘅係每年一至三月審核數旺季之時。睇數字，工時唔算認真長，以每周工作五天計，26%會計師返工40至60小時，即每日8至12小時。左丁山四十年前初入銀行，已經慣咗朝八晚六，或朝八晚七，從未試過五點鐘放工嘅。會計師公會有會員40462人，今年學生（考試中）會員有18000人左右，可見會計師仍然係年青學生嚮往嘅行業。

DOCUMENT ID: 201707303167872

Source: Wisers electronic service. This content, the trademarks and logos belong to Wisers, the relevant organizations or copyright owners. All rights reserved. Any content provided by user is the responsibility of the user and Wisers is not responsible for such content, copyright clearance or any damage/loss suffered as a result.